

GRATIS

**AWE
Mainta**

e corant di Toko

ARUMIL Y GRUPO FORMACION SOCIAL 1A HAYA CERTIFICADO DI APRECIO DI GOBIERNO



Arumil y Grupo Formacion Social 1 a haya certificado di aprecio di Gobierno

Nan a duna un man den e proyecto BoBario na Jan Flemming

Prome Minister Mike Eman y team BoBario bou guia di sra. Ruth Tromp-Schoop a organisa un mainta agradabel den e hof paden di Bestuurskantor pa entrega e Mariniernan di Arumil y e hobennan di grupo Formacion Social I un certificado como muestra di aprecio p'e trabou social haci pa BoBario den e bario di Jan Flemming.

Eynan nan a rosa un mondi grandi y sera pa haci lugar pa dentro di poco traha un parke pa mucha y hobennan den e bario ey. E trabou a dura tres dia.

Un trabou duro, pero cu resultado satisfactorio. Diarazon e Militarnan di Arumil y e cursistanan di Formacion Social I bou guia di Teniente Kock a yega na Bestuurskantor pa wordo ricibi pa Prome Minister Mike Eman y e team BoBario pa nan haya nan certificado di aprecio.



Prome di a bay over na haci entrega di e certificadonan cu tin un potret di e grupo riba dje para dilanti di e mondi cu nan tabata rosando y firma pa

Prome Minister cu palabranan di gratitud riba dje, Eman a dirigi su mes n'e hobennan pa bisa nan un bes mas di ta orguyoso di nan dedicacion. "Sin boso ayudo nos

no por a haci e trabou asina liher". Un pa un e hobennan a wordo yama dilanti pa Madeleine Kelly di e team BoBario pa haya e certificado di Prome Minister Eman.

Teniente R.Kock, kende tambe a haya un certificado di aprecio ta masha satisfecho cu e atencion positivo cu nan ta hayando.

"Tur aprecio cu nos haya, sea ta di comunidad of di parti di Gobierno, nos ta tum'e cu hopi seriedad. E muchanan aki a traha hopi duro. E prome intencion tabata pa hiba e grupo di 12 hoben di Formacion Social so pa haci e trabou, pero ora nos a bay wak e tereno y a ripara cu ta hopi trabou, nos a dicidi di bay cu henter e grupo di Arumil tambe. Nos a contribui asina cu comunidad".

E lugar unda e parke mester bin ta limpi awor y ta keda n'e habitantenan di Jan Fleming pa percura p'e keda asina y pa cuminsa traha e parke asina desea. Ya caba a pone algun banki pa sinta den dje y poco poco e parke ta hayando su forma. Esaki ta un parti di e trabou di BoBario hunto cu e habitantenan mes.